

四庫全書

集部

欽定四庫全書

唐詩紀事卷六十三

宋 計敏夫 撰

方干

劉駕

王駕

衛準

詹雄

顧非熊

司空圖

秦韜玉

潘誠

胡駢

高駢

潘緯

武璣

于鄴

路德延

翁承贊

韓垂

方干

早春云運行元化不參差四極中華共一時正氣纔隨
灰律變殘寒便被柳條欺水融大澤陽春覺草綠陳根
夜雨知不信風光疾於箭年來年去變霜髭

越州使院竹云莫見凌雲飄粉籜須知礙石作盤根細
看枝上蟬吟處猶是笋時蟲食痕月送綠陰斜上砌露
凝寒色濕遮門列仙終日逍遙地烏雀潛來不敢喧

除夜云玉漏斯須即達晨四時吹轉任風輪寒燈短燼
方燒臍畫角殘聲已報春明日便爲經歲客昨朝猶是

少年人新正定數隨年減浮世惟應百遍新

干爲人質野每見人設三拜曰禮數有三識者呼爲方
三拜爲人脣缺連應十餘舉遂歸鏡湖後十數年遇醫
補唇年已老矣鏡湖人號曰補唇先生鏡湖西島閑居
詩曰寒居壓鏡心此處是家林梁燕欺春醉嵒猿學夜
吟雲連平地起月向白波沉猶自聞鐘角栖身可在深
又云世人如不容吾自縱天慵落葉憑風掃秋粳任水
春花朝連郭霧雪夜隔湖鐘身在能無事頭宜白此峰

又感懷云志業不得力到今猶苦吟吟成五字句用破
一生心世路屈聲滿雲溪冤氣深前賢多晚達莫怕鬢
霜侵干爲詩如鶴盤遠勢投孤嶼蟬曳殘聲過別枝齊
梁已來未之有也

孫邵哭元英方先生云斗失文星落知是先生死湖上
聞哭聲門前見彈指官無一寸祿名傳千萬里死着紙
衣裳生誰念朱紫我心痛其語淚落不能已猶喜爲補
闕揚名獻天子

千師徐凝千常刺凝曰把得新詩草裏論反語曰村裏
老餘杭守謂千苦吟曰未能應卒因夜燕以飛字韻命
賦之千詩立成曰間世星郎夜燕時丁丁寒漏滴聲微
琵琶絃促千般調鸚鵡盃深四散飛遍請玉容歌白雪
高燒紅燭照朱衣人間有此榮華事爭遣漁翁戀釣磯
唐末宰臣張文蔚中書舍人封舜卿奏名儒不遇者十
有五人請賜一官以慰冥魂千其一也千寄李頻云山
木又搖落望君還不還軒車何處去雨雪滿前山思苦

寒星動鄉遙釣渚閑明年見名字唯我獨何顏又有題
桃花塢周處士別業云細泉出石飛難盡孤燭和雲濕
不明何事懶於嵇叔夜更無書扎荅公卿又貽天目中
峰客有枯井夜聞隣果落廢巢寒見別禽來之句張爲
取作主客圖

吳融贈于詩曰把筆盡爲詩何人敵夫子句滿天下口
名聒天下耳不識朝不識市曠道遙閑徙倚一杯酒無
萬事一葉舟無千里衣裳白雲坐卧流水霜落風高忽

相憶惠然見訪留一夕一夕聽吟十數篇水榭林蘿為
岑寂拂且捨我亦不辭携筇徑去隨所適無處覓雲半
片鶴一隻

僧可朋贈干詩云盛名傳出自皇州一舉參差便縮頭
月裏豈無攀桂分湖中剛愛釣魚休童偷詩藁呈隣叟
客乞書題謁郡侯獨泛短舟何限景波濤西接洞庭秋
僧貫休贈詩云盛名與高隱合近謝敷村弟子已得桂
先生猶灌園投綸侵海分得句覓雲根白日昇天路知

君別有門

弟子謂李頰也

僧虛中悼干云先生在世日祇向鏡湖居明主未巡狩
白頭閑釣魚烟莎一徑小洲島四隣踈獨有爲儒者時
來弔舊廬

孫邵元英先生傳曰先生新定人字雄飛章八元即先
生外王父也廣明中和間爲律詩江之南未有及者始
謁錢塘守姚公邵公視其貌陋初甚侮之坐定覽卷駭
目變容而歎之先生一舉不得志遂遯於會稽漁於鑑

湖與鄭仁規李頰陶詳爲三益友弟子洪農楊弇釋子
居遠先生卒弇編其詩請舍人王贊爲之序贊序云張
祐升杜甫之堂方干入錢起之室云

劉駕

吳中懷古云勾踐飲膽日吳王酒滿盃笙歌入海雲聲
自姑蘇來西施舞初罷侍兒整金篦衆女不敢妒自比
泉下泥越鼓聲騰騰吳王隔黃溪難將甬東地更學會

稽栖

上已云上已曲江濱喧於市井路相尋不見者此地皆
相遇日光去此遠翠幕張如霧何事歡娛中易覺春城
暮物情重此節不是愛芳樹明日花更多何人肯回顧
駕與曹鄴友善工古風鄴大中時擢第不出京候駕登
科同去

馬上續殘夢馬嘶時復驚心孤多所慮僮僕近我行句
只恐塞上山低於沙中骨句蒲帆出浦去但見浦邊樹
不如馬行郎馬跡猶在路大舟不相載買宅令妾住莫

道留金多本非愛郎富句右張爲取作主客圖

王駕

司空圖喜王駕小儀重陽相訪云白菊初開卧内明聞
君相訪病身輕罇前且撥傷心事谿上還隨覓句行幽
鶴傍人疑舊識殘蟬向月噪新晴擬將寂寞同留住且
勸康時立大名

僖宗幸蜀駕下第還蒲中鄭谷以詩送云孤單取仕休
言命早晚逢人苦愛詩後有次韻王駕校書結綬見寄

之什云直應歸諫苑方肯別山村勤苦常同業孤單共
感恩駕夏雨詩云非惟消旱暑且喜救生民天地如蒸
濕園林似却春洗風清枕簟換夜失埃塵又作豐年望
田夫笑向人

駕字大用河中人登大順進士第仕至禮部員外郎自
稱守素先生與圖谷相爲詩友

衛準 亦作單

莫言閑話是閑話往往事從閑話來句何必剃頭爲弟

子無家便是出家人句右張爲取前句作主客圖準大
曆五年登進士第

詹雄

塵飛遺恨盡花落古宮平

洛陽古城句

紅粉笙歌人代遠月明

陵樹水東流

銅雀臺句

右張爲取作主客圖

顧非熊

寄費冠卿云先生九華隱烏道隔塵埃石室和雲住山
田引燒開久閑仙客降高卧詔書來一入深林去人間

更不回

長安清明言懷云明時帝里遇清明還逐遊人出禁城
九陌芳菲鶯自囀萬家車馬雨初晴客中下第逢今日
愁裏看花獸此生春色來年誰是主不堪悲悴更無成
非熊滑稽好凌轢在舉場垂三十年長慶中登第劉得
仁賀以詩云愚爲童稚時已解念君詩及得高科晚須
逢聖主知成名歸茅山項斯送以詩曰吟詩三十載成
此一名難自有恩門入全無帝里歡湖光愁裏碧嵩影

夢中寒到後杉松月何人共曉看非熊大中時自盱眙簿棄官隱茅山

非熊况之子段成式云况始喪子年七十况哭之曰老人喪愛子旦暮哭成血聲逐斷猿悲跡隨飛鳥滅老夫已七十不作多時別後再生子七歲其兄戲批之忽曰我爾之兄何故批我乃叙前生厯厯不誤即非熊也

姚合送非熊下第歸越詩云失意尋歸路親知不便過家山向城遠日月在船多楚塞數逢鴈浙江長有波秋

風別卿老還聽鹿鳴歌

賈島寄非熊詩云知君歸有處山水亦難齊猶去瀟湘
遠不聞猿狖啼穴通茅嶺下潮滿石城西獨立生遙思
秋原日漸低

司空圖

圖與李生論詩云文之難而詩之難尤難古今之喻多
矣而愚以辨於味而后可以言詩也江嶺之南凡是資
於適口者若醯非不酸也止於酸而已若醢非不鹹也

止於鹹而已華之人所以充饑而遽輟者知其鹹酸之外醇美者有所乏耳彼江嶺之人習之而不辨者宜哉詩貫六義則諷諭抑揚澆蓄淵雅皆在其間矣然直致所得以格自竒前輩諸集亦不專工於此矧其下者耶王右丞韋蘇州澄澹精緻格在其中豈妨於道舉哉賈閻仙誠有警句視其全篇意思殊餒大抵附寒澁方可置才亦爲體之不備也矧其下者哉噫近而不浮遠而不盡然後可以言韻外之致耳愚幼嘗自負既久而愈

覺缺然得於春早則有草嫩侵沙長水輕著雨消又人
家寒食月花影午時天又雨微吟思足花落夢無聊得
於山中則有坡暖冬生筍松涼夏健人又川明虹照雨
樹密鳥衝人得於江南則戍鼓和潮暗船燈照鳥幽又
曲塘春盡雨方響夜深船又夜短猿悲滅風和鵲喜靈
得於塞下則有馬色經寒慘鴈聲帶晚饑得於喪亂則
有驂騑思故第鸚鵡失佳人又鯨鮪人海涸魑魅棘林
高得於道宮則有棋聲花院靜幡影石壇高得於夏景

則有地涼清鶴夢林靜蕭僧儀得於佛寺則有松日明
金像苔龕響木魚又解吟僧亦俗愛舞鶴終卑得於郊
園則有遠坡春早滲猶有水禽飛得於樂府則有晚粧
留拜月春睡更生香得於寂寥則有孤螢出荒池落葉
穿破屋得於愜適則有客來當意愜花發遇歌成雖庶
幾不濱於淺涸亦未廢作者之譏訶也七言云逃難人
多分隙地放生鹿大出寒林又得劍乍如添健僕七書
久似憶良朋又孤嶼池痕春漲滿小欄花韻午晴初又

故國春歸未有涯
小欄高檻別人家
五更惆悵迴孤枕
猶自殘燈照落花
又甲子今重數
生涯只自憐
殷勤元昨日
旁午又明年
皆不拘一槩也
今足下之詩時輩固
有難及儻復以全羨爲上即知味外旨矣

與王駕評詩云末伎之工雖蒙譽於賢哲未足自信必
俟推於其類而后神躍而色揚今之贊藝者反是若即
醫而靳其病也唯恐彼之善察藥之我攻耳以爲率人
以謾莫能自振痛哉且工之尤者莫若彼於文章其能

不死於詩者比他伎尤寡豈可容易校量哉圖幼生上好文雅風流特盛沈宋始興之後傑出於江寧宏肆於李杜極矣右丞蘇州趣味澄曼若清沈之貫達大厯十數公抑又其次焉力勅而氣孱乃都市豪沽耳劉公夢得楊巨源亦各有勝會閩仙無可劉得仁輩時得佳致亦足滌煩厥後所聞逾褊淺矣然河汾蟠鬱之氣宜繼有人今王生者寓居其間沉清益久五言所得長於思興皆乃詩家之所尚者則前所謂必推於其類豈止神

躍色揚哉經亂索居得其所錄尚累百篇其勤亦至矣
吾適又自編一鳴集且云撐霆裂月劼作者之肝脾亦
當吾言之無怍也

王禹偁五代史闕文云圖字表聖自言泗州人有俊才
咸通中登進士第雅好爲文躁於進取頗自矜伐端士
鄙之從事使府洎登朝驟歷清顯巢賊之亂車駕播遷
圖有先人舊業在中條山極林泉之美圖自禮部員外
郎避地焉日以詩酒自娛屬天下版蕩士人多往依之

互相推獎由是聲名籍甚昭宗反正以戶部侍郎召至
京師圖既負才慢世謂已當爲宰輔時人惡之稍抑其
銳圖憤憤謝病復歸中條與人書疏不名官位但稱知
非子又稱奈辱居士其所居在禎賂之上結茅屋命
曰休休亭嘗自爲亭記云云已上梁史舊文謹案圖河中虞鄉
人少有文采未爲鄉里所稱會王凝自尚書郎出爲絳
州刺史圖以文謁之大爲凝知入知制誥遷中書舍人
知貢舉擢圖上第項之凝出爲宣州觀察史辟圖爲從

事既度江御史府奏圖監察下詔追之圖感凝知己之恩不忍輕離幕府滿百日不赴闕爲臺司所劾遂以本官分司久之召拜禮部員外郎俄知制誥故集中有文曰戀恩稽命黜繫洛師於今十年方忝綸閣此豈躁于進取者即曰史不詳一至於此圖見唐政多僻中官用事知天下必亂即棄官歸中條山尋以中書舍人召拜禮部戶部侍郎皆不起及昭宗播遷華下圖以密邇乘輿即時奔問復歸還山故其詩曰多病形容五十三誰

憐借笏赴朝參此豈有意於相位邪河中節度使王重
榮誑圖撰碑得絹數千疋圖致于虞鄉市中恣鄉人所
取一日而盡是時盜賊充斥獨不入王官谷河中士人
依圖避難獲免者甚衆昭宗東遷又以兵部侍郎召至
洛下爲柳璨所沮一謝而退梁祖授禪以禮部尚書召
辭以老病卒時年八十餘又案梁興大臣如敬翔李振
杜曉楊涉等皆唐朝舊族本以忠義立身重侯累將三
百餘年一旦委質朱梁其甚者贊成殺逆唯圖以清直

避世終身不仕梁祖故梁史拾圖小瑕以泯大節者良
有以也裴晉公赴敵淮西題名華岳之闕門大順中圖
以一絕紀之云岳前大隊赴淮西從此中原息鼓鼙石
闕莫教苔蘚上分明認取晉公題題休休亭之楹曰咄
諾休休休莫莫莫伎倆雖多性靈惡賴是長教閑處著
休休休莫莫莫一局棋一爐藥天意時情且料度白日
偏催人快活黃金難買堪騎鶴若曰尔何能荅曰耐苦
莫柳傑爲相臣僚多被放逐圖爲監察御史尤加畏慎

昭宗郊禮畢上章懇乞致仕曰察臣本意非爲官榮可
驗衰羸庶全名節上特賜歸山其詔畧曰既養高以傲
世類移山以釣名心惟樂於漱流仕非顯於食祿匪夷
匪惠特忘艾正之朝載省載思當狗遯棲之志宜放歸
中條山詔辭乃傑之文也時多以四皓二疎譽之惟僧
虛中云道裝汀鶴識春醉野人扶言其操履檢身非傲
世者也又云有時看御扎特地挂朝衣言其尊戴存誠
非邀君也

退栖云宦遊蕭索爲無能移住中條最上層得劍乍如
添健僕亡書久似憶良朋燕昭不是空憐馬支遁何妨
亦愛鷹自致此身繩檢外肯教世路日兢兢

華下云日炙旱雲裂迸爲千道血天地沸一鑊竟自身
妖孽堯湯遇災數災數還中輟何事姦與邪古來難撲滅
僧舍貽友人云笑破人間事吾徒莫自欺解吟僧亦俗
愛舞鶴終卑竹上題幽夢溪邊約敵碁舊山歸有阻不
是故遲遲

長安贈王云云正下搜賢詔多君獨避名客來當意慚
花發遇歌成樂地留高趣權門讓後生東風閑小駟園
外好同行

下方云昏旦松軒下怡然對一瓢雨微吟足思花落夢
無慘細事當碁遣衰容喜鏡饒溪僧有深趣書至又相
邀

黃巢陷長安孫樵赴岐隴授職方員外詔書曰行在三
絕以常侍李膺有曾閔之行圖有巢由之風樵有楊馬

之文故也

秦韜玉

對花云長與韶光暗有期
可憐蜂蝶却先知
誰家促席臨低樹
何處橫釵帶小枝
麗日多晴疑曲照
和風得路合偏吹
向人強道渾無語
幾勸王孫到醉時

貧女云蓬門未識綺羅香
擬托良媒益自傷
誰念風流高格調
共憐時世儉梳粧
敢將十指誇纖巧
不把雙眉鬪畫長
每恨年年壓金線
爲他人作嫁衣裳

貴公子行云堦前莎毬綠不捲銀龜噴香挽不斷亂花
織錦柳撚線粧點池臺畫屏展主人公業傳國初六親
聯絡馳朝車鬪鷄走狗家世事抱來皆佩黃金魚却笑
儒生把書卷學得顏回忍飢面

韜玉字仲明京兆人父爲左軍軍將韜出入田令孜之
門又與劉曄及李崑士姜垵蔡鋌之徒交遊中貴各將
兩軍書尺僥求魏科時謂對軍解頸僖宗幸蜀韜玉以
工部侍郎爲令孜神策判官小歸公主文韜玉准勅及

第仍編入榜中韜玉以書謝新人呼同年曰三條燭下
雖阻門闌數仞墻邊幸同恩地

潘誠

棧踏猿聲暮江看劍影秋

送人遊蜀句

僧老白雲上磬寒高

鳥邊句心已同猿狖不聞人是非句三月獨立看花月

只欠子規啼一聲

長安句

行人渡流水白馬入前山句秋

深雪滿黃金塞夜夜鴻聲入漢陽句右張爲取作主客

圖

胡駢

經費拾遺舊隱詩云林下茅齋已半傾九華幽逕少人行不將冠劍爲榮事只向烟蘿寄此身松竹漸荒池上色琴書徒立世間名白楊風起秋山暮時復哀猿啼一聲駢唐末進士也

高駢

駢鎮蜀日以南詔侵暴築羅城四十里朝廷雖加恩賞亦疑其固護或一日聞奏樂聲響知有改移乃題風箏

寄意曰夜靜絃聲響碧空宮商信任往來風依稀似曲
纔堪聽又被移將別調中旬日報到移鎮渚宮

駢好爲詩雅有竒藻其言懷詩曰恨乏平戎策慙登拜
將壇手持金鉞冷身掛鐵衣寒主聖扶持易恩深報効
難三邊猶未靜何敢便休官

又二妃廟云帝舜南巡去不還二妃幽怨水雲間當時
珠淚垂多少直到如今竹尚班

又雪詩云六出花飄入戶時立看修竹變瓊枝逡巡好

上高樓看蓋盡人間惡路岐

聽歌詩云公子邀歡月滿樓佳人揭調唱伊州便將席
上秋風起直到蕭關水盡頭

又寄僧筇竹杖詩云堅輕筇竹杖一枝有九節寄與沃
州僧閑步秋山月

光啓三年駢鎮淮海三月看花駢與諸從事詩其末云
人間無限傷心事不得樽前折一枝蓋亡滅之讖也及
被幽辱計口給食自五月至八月外圍益急遂及於難

駢字千里崇文孫也生於長慶之首卒於光啓之間家
世禁衛頗修飭折爲文學與諸儒交硜硜談治道兩軍
中人更稱譽之號落雕侍御赴安南却寄台司云曾驅
萬馬靜江山風去雲迴頃刻間今日海門南面事莫教
還似鳳林關

步虛詞云青溪道士人不識上天下天鶴一隻洞門深
鎖碧牕寒滴露研朱點周易

題羅浮別業云不將真性染埃塵爲有烟霞伴此身帶

月長江好歸去博羅山下碧桃春

聞河中王鐸加都統云煉汞燒鉛四十年至今猶在藥

爐前不知子晉緣何事只學吹簫便得仙

其驕傲不
平如此

潘緯

中秋月云古今逢此夜共冀泐寥明豈是月華別祇應
秋氣清影當中土正輪對八荒平尋客徒留望璿璣自
有程

琴云客來鳴素琴惆悵對遺音一曲起於古幾人聽到

今盡含風靄遠日泛月烟深風續水山操坐生方外心
湘南何涓瀟湘賦緯古鏡詩天下傳之或曰潘緯十年
吟古鏡何涓一夜賦瀟湘登咸通進士第

武瓘

九日衛使君筵上作云佳晨登賞喜還鄉謝宇開筵晚
興長滿眼黃花初泛酒隔烟紅樹欲迎霜千家門戶笙
歌發十里江山白鳥翔共賀安人豐樂歲幸陪珠履侍
銀章

璿登咸通進士第唐末宰益陽

勸酒云勸君金屈卮滿酌不須辭
花發多風雨人生足別離

感事云花開蝶滿枝花謝蝶還稀
唯有舊巢燕主人貧亦歸
灌初投卷於知舉蕭倣見是詩賞其有存故之志
遂放及第

于鄴

孤雲詩云南北各萬里有雲心更閑
因風離海上伴月

到人間洛浦少高樹長安無舊山徘徊不可駐漠漠又東還

蟬詩云江頭一聲起芳樹已難留聽此高樹上遙知故國秋應催風落葉似勸客回舟不是新蟬苦年年自有愁

鄴唐末進士也

路德延

德延儋州巖相之猶子數歲嘗賦芭蕉詩曰一種靈苗

異天然體性虛葉如斜界紙心似倒抽書詩成翌日傳
於都下會儋州坐事誅故德延久不能振光化初方就
舉擢第又爲感舊詩曰初騎竹馬詠芭蕉嘗忝名卿誦
滿朝五字便容趨絳帳一枝尋許折丹霄豈知流落萍
蓬遠不覺推遷歲月遙國境未安身未立至今顏巷守
簞瓢天祐中授拾遺會河中節度使朱友諲領鎮辟掌
書記友諲甚禮之然德延浮薄動多忤物友諲解禮德
延乃作小兒詩五十韻以刺友諲友諲聞而大怒乃因

醉沉之黃河詩曰情態任天然桃紅兩頰鮮乍行人共
看初語客多憐臂膊肥如瓠肌膚軟勝綿長頭纔覆額
分角漸垂肩散誕無塵慮逍遙占地仙排衙朱閣上唱
道畫堂前合調歌楊柳齊聲踏採蓮走堤行細雨奔巷
趨輕烟嫩竹乘爲馬新蒲折作鞭鷲雛金鏃繫猫子綵
絲牽擁鶴歸晴島驅鷺入暖泉楊花爭弄雪榆葉共收
錢錫鏡當胸挂銀珠對耳懸頭依蒼鶻裹袖學柘枝擅
酒滌丹砂暖茶催小玉煎頻邀籌箸掙時乞繡針穿寶

篋挈紅豆粧奩拾翠鈿戲袍被按禡尖帽戴靴氈展畫
趨三聖開屏笑七賢貯懷青杏小垂額綠荷圓驚滴沾
羅淚嬌流污錦涎倦書饒姪姤憎藥巧遷延弄帳燕綃
映藏衾鳳綺纏指敲銀使鼓筋撥賽神絃簾拂魚鈎動
箏推鴈柱偏碁圖添路畫笛管欠聲鑿惱客初酣睡驚
僧半入禪尋蛛窮屋瓦採雀遍樓椽拋果忙開口藏鈎
亂出拳夜分圍楸枰朝聚打鞦韆折竹裝泥鷺添絲放
紙鳶互誇輪水碓相教放風旋旗小裁紅絹書幽截碧

牋遠鋪張，鴿網低控。射蠅弦，詁語時時道。謠歌處處傳。
匿牕眉，尔曲遮路臂相連。鬪草當春，逕爭毬出晚田柳。
傍慵獨坐花底，困橫眠。等鵲潛籬畔，聽蛩伏砌邊。旁枝
粘舞蝶，隈樹捉鳴蟬。平島誇趨上層崖，逞捷緣嫩苔車
跡。小深雪履痕全競，指雲生岫齊呼。月上天蟻窠，尋逕
斲蜂穴，逶迤堦填樵唱。迴深嶺牛歌，下遠川壘柴爲屋木。
和土作盤筵，險砌高臺石危跳。峻塔塼忽陞隣舍，樹偷
上後池船。項橐稱師日，甘羅作相年。明時方任德，勸尔

減狂顛

翁承贊

蕭蕭風雨建陽溪
溪畔維舟見亞齊
一軸新詩劍潭北
十年舊識華山西
吟魂惜向江村老
空性元知世路迷
應笑乘輶青瑣客
此時無暇聽猿啼

右承贊詩承贊字文堯閩人唐末爲諫議大夫使福州
至劍浦見舊識僧亞齊贈此章

承贊乾寧進士也

唐語曰槐花黃舉子忙承贊有詩曰雨中粧點望中黃
勾引蟬聲送夕陽憶得當年隨計吏馬蹄終日爲君忙

韓垂

垂唐之詩人也題金山云靈山一峰秀岌然殊衆山盤
根大江底影掙浮雲間雷霆常間作風雨時往還象外
懸清影千載長躋攀其詩偶爲庸僧所毀江南時李鍾
山留一絕云不嗟白髮曾遊此不嘆征帆無了期盡日

憑欄誰會我只悲不見韓垂詩

鍾山公
建勳也

唐詩紀事卷六十三

欽定四庫全書

唐詩紀事卷六十四

宋 計敏夫 撰

顏萱

李穀

司馬都

崔璞

鄭壁

魏朴

張賁

陸龜蒙

皮日休

崔璐

任蕃

盧休

劉畋

顏萱

送羊振文歸覲桂陽云高掛吳帆喜動容問安歸去指

湘峰懸魚庭內芝蘭秀馭鶴門前薜荔封

蘇晚舊宅在桂州

紅

旆正憐棠影茂綵衣偏帶桂香濃臨歧獨有霑襟戀南

巷當年共化龍

先輩拾遺叔父同年

送圓載上人云師來一世恣經行却泛滄波問去程心

靜已能防渴鹿聲喧時為駭長鯨

師云舟人遇鯨則鳴鼓

禪林幾

結金桃重

日本金桃實重一斤

梵室重修鐵瓦輕

似鐵為瓦輕于陶者

料得

還鄉無別利只應先見日華生

萱字弘至江南進士也中書舍人堯之弟嘗受知於張

祐故弔祐詩序曰尚意孩稚之歲與伯氏常承處士撫
抱之仁目管輅爲神童期孔融於偉器萱唐末與皮陸
二生酬唱有詩載松陵集

李穀

和皮日休悼鶴云才子襟期本上清陸雲家鶴伴閑情
猶憐反顧五六里何意忽歸十二城露滴誰聞高葉墜
月沉休藉半階明人間華表堪留語剩向秋風寄一聲
又云道林曾放雪翎飛應悔庭除閉羽衣料得王恭披

鶴氅倚吟猶待月中歸

浙東罷府西歸酬別張廣文皮先輩陸秀才詩云豈有
頭風筆下痊浪成蠻語向初筵蘭亭舊趾雖曾見柯笛
遺音更不傳照曜文星吳分野留連花月晉名賢相逢
只恨相知晚一曲驪歌又幾年

毅字德師咸通進士也唐末爲浙東觀察推官兼殿中
侍御史日休松陵集序云南陽廣文潤卿隴西侍御德
師咸旅泊之際善其所爲皆以詞致師詞之不多去之

速也穀西歸日休詩云建安才子太微仙暫上金臺許
二年形影欲歸溫室樹夢魂猶傍越溪蓮空將海月爲
倉鬼恨吳天

詩脫下段

司馬都

和陸龜蒙白菊詩云耻共金英一例開素芳須待早霜
催繞籬看見成瑤圃泛酒應宜傍玉杯映水好將蘋作
伴犯寒疑與雪爲媒夫君每尚風流事應爲徐妃致此
栽

都咸通中進士

鄭壁

和陸龜蒙白菊詩云白艷輕明帶露痕始知佳色重難
群終朝疑笑梁王雪盡日慵看蜀帝雲燕雨似翻瑤渚
浪鴈風疑卷玉綃紋瓊妃若會寬裁剪堪作蟾宮夜舞
裙

壁唐末江南進士也與皮陸二生酬唱又有寒夜文燕
張潤卿有期不至詩云已知羽駕朝金闕不用燒蘭望

玉京應是登仙明月好
玉皇留看舞雙成

崔璞

奉酬霜菊見贈詩云
菊花開晚過秋風
聞道芳香正滿叢
爭奈病夫難強飲
應須速自召車公

蒙恩除替將還京洛
偶叙所懷云兩載
求人瘼三春受代
歸務繁多簿籍才
短少恩威共理乖
天獎分憂值歲饑
遽蒙交郡印

到任十二個月
除替未及三年

安敢整朝衣作牧
慙爲

政思鄉念式微儻容
還故里高卧掩柴扉

璞唐末以大司諫刺蘇州其詩見皮陸二生松林唱和集

魏朴

和皮日休悼鶴云直欲裁詩問杳冥豈教靈化亦浮生
風林月動疑留魄沙島香愁似蘊情雪骨夜封蒼蘚冷
練衣寒在碧塘輕人間飛去猶堪恨况是泉臺遠玉京
又云經秋宋玉已悲傷况報胎禽昨夜亡霜曉起來無
問處伴僧彈指遶荷塘

朴唐末吳中名士也皮日休松陵詩序云潤卿德師旅泊之際以詞致師大司諫清河公有作崔璞或命之和亦

著焉其餘則吳中名士

謂司馬都鄭
璧朴與顏萱

張賈

旅泊吳門云一舸吳江晚堪憂病廣文鱸魚誰與伴鷗鳥自成羣反照縱橫水斜空斷續雲異鄉無限思盡付

酒醺醺

酬襲美先輩見寄云尋疑天意喪斯文故選茅峰寄白

雲酒後只留滄海客香前唯見紫陽君近年已絕詩書癖今日兼將筆硯焚爲有此身猶苦患不知何者是玄

纁

和陸龜蒙白菊詩云雪彩冰姿號女華寄聲多是地仙家有時南國和霜立幾處東籬伴月斜謝客瓊枝空貯恨袁郎金鈿不成誇自知終古清香在更出梅粧弄晚霞

賈字閨卿南陽人登大中進士第唐末爲廣文博士寓

吳中與皮陸二生游其詩多羈旅感激若異鄉無限思
盡付酒醺醺

又送李穀西歸云孤雲獨鳥本無依江海重逢故舊稀
楊柳漸疎蘆葦白可堪斜日送君歸

陸龜蒙

字魯望父虞賓浙東從事居蘇臺龜蒙攻文與顏荦皮
日休羅隱吳融友善家貧與張博爲廬江吳興二郡丞
李蔚盧携景重之羅隱寄詩曰龍樓李丞相昔歲仰高

文黃閣今無主青山竟不焚夜船乘海月秋寺伴江雲
只恐塵埃裏浮名點汚君唐末以左拾遺授之詔下日
以疾終于家

皮日休松陵唱和集序云咸通十年日休爲吳郡郡從
事有進士陸龜蒙以其業見造其才之變真天地之氣
也近代稱溫飛卿李義山爲之最俾生參之未知孰爲
後先

龜蒙三吳人也博雅多文尤善談笑嘗體江謝賦事名

振吳下藏書萬餘卷詩篇清麗與皮日休爲友唱和若干卷號曰松陵集中和初遇疾而卒陳給事爲文誌其墓矣吳子華奠文千餘言略曰大風吹海海波淪漣涵爲子文無偶無邊長松倚雪枯枝半折挺爲子文真上巔絕風下霜晴寒鍾自聲發爲子文鏗鏘杳清武陵深間川長晝白問爲子文渺茫岑寂豕突鯨狂其來莫當雲沉鳥沒去其倏忽膩若凝脂軟於無骨霏漠漠澹涓涓春哆冶秋鮮妍觸即碎潭下月拭不滅玉上煙

江湖散人歌云江湖散人天骨竒短髮搔來蓬半垂手
捉孤篁曳寒繭口誦太古滄浪詞詞云太古萬萬古民
怪甚埜音野無風期夜棲正與禽獸雜獨自架結縱橫枝

因而稱曰有巢氏民共敬貴如君師當時只効烏鵲輩
豈是有意陳尊卑無端後聖穿鑿破一派前導千流隨
多方惱亂元氣死日使父子生姦欺聖人事業轉消耗
尚有漁者存熙熙風波不獨因一士凡百器具皆能施
眾疎滬腐鱸鰕肥上失檢馭無讒疵人間所謂好男子

我見婦女留鬚眉奴顏婢膝真乞丐反以正直爲狂癡
所以頭欲散不散弁我巍所以腰欲散不散珮陸離行
散任之適坐散從傾歌語散空谷應笑散春容披衣散
單複便食散酸醎宜客散忘簪履禽散虛籠池外物一
以散中心散何疑不共諸侯分邑里不與天子專隍陴
靜則守桑柘亂則逃妻兒金鑣紳帶未嘗識白刃投我
窮生爲或聞蕃將負恩澤號令鐵馬如風馳大君年小
丞相少當軸自請都旌旗神鋒悉出羽林仗繪畫日月

蟠龍螭太宗基業甚牢固小醜背叛當殲夷禁軍近自
肅宗署抑遏輔國爭雄唯必然大段剪兇逆須召勁勇
持軍麾四方賊壘猶占地死者暴骨生寒飢歸來輒擬
荷鋤立詬吏已責租錢遲興師十萬一日費不翅千金
何以支祗今利口且箕歛何暇俛首哀惻嫠均荒補敗
豈無術布在方策撐頽熾冰霜襦袴易反掌白面諸郎
殊不知江湖散人悲古道悠悠幸寄義皇傲官家未議
活蒼生拜賜江湖散人號

甫里先生傳云少攻歌詩與造物者爭柄遇事輒變化不一其體裁始則凌轢波濤穿穴險固囚鑠怪異破碎陣敵卒造平澹而後已

龜蒙居震澤之南巨積注有閩鴨一欄有驛使過挾彈斃其尤者蒙拂乎不樂因云此鴨能人語待附蘇州上進使者斃之奈何使人恐酬以橐中金俟其相悅方請人語之由曰能呼其名使人憤且笑拂袖上馬復召之還其金曰吾戲耳龜蒙少高放從張搏遊歷湖蘇二州

辟以自佐嘗至饒州三日無所詣刺史蔡京率官屬就見之龜蒙不樂拂衣去不喜交流俗不乘馬升舟設蓬席齋束書茶竈筆牀釣具往來時謂江湖散人或號天隨子甫里先生自比涪翁漁父江上丈人

皮日休

日休字襲美襄陽人咸通中爲太常博士遭亂歸吳中黃巢寇江浙劫以從軍至京師以爲翰林學士今日休作讖云欲識聖人姓田八二十一欲知聖人名果頭三

屈律巢大怒蓋巢頭醜掠鬢不盡疑譏之也遂及禍
日休寒日書齋即事三章云參佐三間似草堂恬然無
事可成忙移時寂歷澆松子盡日殷勤拂乳牀將近道
齋先衣褐欲清詩思更焚香空庭好待中宵月獨禮星
辰學步罡

不知何事有生涯皮褐裁衣學道家深夜數甌唯柏葉
清晨一氣是雲華盆池有鷺窺蘋末石板無人掃桂花
江漢欲歸應未得夜來頻夢赤城霞

方朔家貧未有車肯從榮利捨樵漁從公未恠多侵酒
見客唯求轉借書暫聽松風生意足偶看溪月世情疎
如鈎得貴非吾事合向煙波爲五魚

松江有五魚

日休賦龜詩嘲歸仁紹云硬骨殘形知幾秋屍骸終是
不風流頑皮死後鑽須遍只爲平生不出頭

歸氏子以姓嘲日休云八片尖斜砌作裘火中燬了水
中揉一包閑氣如常在惹踢招拳卒未休

北夢瑣言云日休傲誕自號間氣布衣日休之子光業

辭文宏贍唐末爲越州副使

松陵集序曰詩有六義其一曰比比者定物之情狀也則必謂之才才之備者於聖爲六藝在賢爲聲詩噫春秋之後頌聲亡寢降及漢氏詩道荐作然二雅之風委而不興矣在詩有三言四言五言六言七言之作三言者曰振振鷺鷺于飛是也五言者曰誰謂雀無角何以穿我屋是也六言者我姑酌彼金罍是也七言者交交黃鳥止于桑是也九言者曰澗酌彼行潦挹彼注兹是

也蓋古詩率以四言爲本而漢氏方以五言七言爲之也其句亦出於周詩五言者李陵曰携手上河梁是也七言漢武曰日月星辰和四時是也爾後盛於建安以降江左君臣得以浮艷然詩之六義微矣逮及吾唐開元之世易其體爲律焉始切於儷偶拘於聲勢然詩云遘憫既多受侮不少其對也工矣堯典曰聲依永律和聲其爲律也甚矣由漢及唐詩之道盡矣吾又不知千祀之後詩之道止於斯而已即後有變而作者不得以

知之夫才之備者猶天地之氣乎氣者止乎一也分而爲四時其爲春則煦枯發枿如弃如濩百物融洽酣人肌骨其爲夏則赫曦朝升天地如窰草蕉木暘若燎毛髮其爲秋則涼颼高瞥若露天骨景爽夕清神不蔽形其爲冬則霜陣一棲萬物皆瘁雲沮日慘若憚天責夫如是豈拘於一哉亦變之而已人之有才者不變則已苟變之豈異於是乎故才之用也廣之為滄溟細之為四竇高之為山岳碎之為瓦礫美之為西子惡之為敷洽

壯之爲武賁弱之爲處女大則八荒之外不可窮小則一毫之末不可見苟其才如是復能善用之則庖丁之牛慶之輪郢之斤不足喻其神解也噫古之士窮達必形於歌詠苟欲見乎志非文不能宣也於是爲其詞詞之作固不能獨善必須人以成之昔周公爲詩以貽成王吉甫作頌以贈申伯詩之酬贈其來尚矣後每爲詩必多依倣焉咸通七年今兵部令狐員外在淮南今中書舍人公守毗陵日休皆以詞獲幸悉蒙以所製命之

和各軸亦有名其守者十年大司諫清河公世牧於吳日休爲郡從事居一月有進士陸龜蒙以其業見造凡數編其才之變真天地之氣也近代稱溫飛卿李義山爲之最俾生參之未知其孰爲之後先

雜體詩序云案舜典帝曰夔命汝典樂教胄子詩言志歌永言在焉周禮太師之職掌教六詩諷賦比興風雅互作雜體遂生然後係之于樂府蓋典樂之職也在漢代李延年爲協律造新聲雅道缺樂府乃盛鏡歌鼓吹

拂舞于俞因斯而興詞之體不得不因時而易也古樂
書論之甚詳今不能備載載其他見者漢武集元封三
年作柏梁臺詔群臣二千石有能爲七言詩者乃得上
座帝曰日月星辰和四時梁王曰駮駕駟馬從梁來由
是聯句興焉孔融詩曰漁父屈節水潛匿方作郡姓名
字離合也由是離合興焉晉傅咸有迴文反覆詩二首
云反覆其文者以示憂心展轉也悠悠遠邁獨瑩瑩是
也由是反覆興焉梁武帝云後牖有朽柳沈約云偏眠

船舷邊由是疊韻興焉詩云螭螭在東又曰鴛鴦在梁
由是雙聲興焉詩云惟南有箕不可以簸揚惟北有斗
不可以挹酒漿近乎戲也古詩或爲之蓋風俗之言也
古有採詩官命之曰風人圍碁燒敗襖看子故依然由
是風人之作興焉梁書云昭明善賦短韻吳均善壓強
韻今亦効而爲之存于編中陸生與子各有是爲凡八
十六首如四聲詩三字離合全篇雙聲疊韻之作悉陸
生所爲又足見其多能也案齊竟陵王郡縣詩曰追共

承荔浦一道信雲邛縣名由是興焉案梁元藥名詩曰
戍客常山下當思衣錦歸藥名由是興焉陸與予亦有
是作至如鮑昭之建除沈炯之六甲十二屬梁簡文之
卦名陸惠曉之百姓梁元帝之鳥名龜兆蔡黃門之口
字古詩兩頭纖纖藁砧五雜組已降非不能也皆鄙而
不爲噫由古至律由律至雜詩詩之道盡乎此也近代
作雜體唯劉賓客集中有迴文離合雙聲疊韻如聯句
則莫若孟東野與韓文公之多他集罕見足知爲之之

難也

日休疊韻山中吟云穿煙泉潺湲觸竹犢殼棘荒篁香
墻匡熟鹿伏屈曲

雙聲溪上思云疎杉低通灘冷鷺立亂浪草彩欲夷猶
雲空容澹蕩

晚秋吟

以題十五
字離合

東臯煙雨歸耕日免去黃冠手刈禾

火滿酒壚詩在口今人無計奈儂何

藥名離合夏日即事云季春人病拋芳杜仲夏溪波遶

壞垣衣典濁醪身倚桂心中無事到雲昏

懷鹿門縣名離合云山瘦更培秋後桂溪澄閑數晚來
魚臺前過鴈盈千百泉石無情不寄書

寒日古人名云北顧懽遊悲沈宋

梁武改為北顧

南徐陵寢嘆

齊梁水邊韶景無窮柳寒被江淹一半黃

風人詩云江上秋聲起從來浪得名逆風猶掛席苦不
會帆情

陸龜蒙詩云十萬全師出遙知正憶君一心如瑞麥唯

作兩歧分

崔璐

璐有覽皮先輩盛製詩贈日休云河嶽挺靈異星辰精
氣殊在人爲英傑與國作禎符襄陽得竒士俊邁真龍
駒勇果魯仲由文賦蜀相如渾浩江海廣葩華桃李敷
小言人無間大言塞空虛幾人遊赤水夫子得玄珠鬼
神爭與祕天地惜洪鑪既比曾參行仍兼君子儒吾知
上帝意將使居黃樞好保千金體須爲萬姓謨

日休和云伊余幼且賤所稟自以殊弱歲謬知道有心
匡皇符意超海上鷹運跼轅下駒縱性作古文所爲皆
自如但恐才格劣敢誇詞彩敷句句考事實篇篇窮玄
虛誰能變羊質競不獲驪珠粵有造化手曾聞天地鑪
文章鄴下秀氣貌淹中儒展我此志業期君持中樞蒼
生眼穿望勿作磻溪謨

璐登咸通七年進士第

任蕃

宮怨云淚乾紅落臉心盡白垂頭自此方知怨從來豈
信愁蕃又有無語與春別細看枝上紅之句張爲取作
主客圖

盧休

春寒酒力遲冉冉生微紅

寒月
聯句

自然草木性誰祝元化

功句湓浦風生破膽愁


句

血染劍花明帳幕三千車馬

出漁陽句右張爲取作主客圖休不第

劉畋

畝有晚泊漢江渡詩云末秋雲木輕蓮拆晚香清雨下
侵苔色雲涼出浪聲疊帆依岸盡微照夾堤明渡吏已
頭白遙知客姓名又有雨後句云殘陽來霽岫獨興起
滄洲張爲取作主客圖舉進士



唐詩紀事卷六十四

欽定四庫全書

集部

唐詩紀事卷六十五

八

詳校官監察御史臣沈孫璉

主事銜臣徐以坤覆勘

覆校官中書臣呂雲棟

校對官原任典簿臣郭祚熾

謄錄監生臣陳際龍

欽定四庫全書

唐詩紀事卷六十五

宋 計敏夫 撰

袁郊

盧延讓

裴說

張爲

韓偓

曹松

杜荀鶴

孫棨

王鐸

鄭棻

胡玠

楊收

平曾

繆島雲

袁郊

月詩云常娥竊藥出人間藏在蟾宮不放還后羿遍尋

無覓處誰知天上却容姦

霜詩云古今何事不思量盡信鄒生感彼蒼但想燕山
吹暖律炎天豈不解飛霜

露詩云湛湛騰空下碧霄地卑濕處更偏饒管茅豐草
皆霑潤不道良田有旱苗

雲詩云楚甸嘗聞旱魃侵從龍應合解爲霖荒淫却入
陽臺夢感亂懷襄父子心

郊咸通時爲祠部郎中有甘澤謠九章與溫庭筠酬唱

庭筠有開成五年抱疾不得預計偕詩寄郊云逸足皆
先路窮蛟獨向隅是也

郊字之儀滋之子也昭宗時爲翰林學士

盧延讓

延讓吟詩多著尋常容易語如送周太保赴浙西云臂
鷹健卒懸羶帽騎馬佳人卷畫衫又寄友人云每過私
第邀看鶴長着公裳送上驢然於數篇見境尤妙有松
寺云山寺取涼當夏夜共僧蹲坐石塔前兩三條電欲

爲雨七八个星猶在天衣汗稍停牀上扇茶香時撥澗
中泉通宵聽論蓮華義不藉松牕一覺眠

又苦吟云莫話詩中事詩中難更無吟安一个字撚斷
數莖鬚險覓天應悶狂搜海亦枯不同文賦易爲著者
之乎

又贈僧云浮世浮華一斷空偶拋煩惱到蓮宮高僧解
語牙無水老鶴能飛骨有風野色吟餘生竹外山陰坐
久入池中禪師莫問求名苦滋味過於食蓼虫

曾獻王建詩有栗爆燒氈破猫跳觸鼎翻後建冬夜與
潘峭平章邊事旋令宮人燒栗俄有數栗爆出燒繡褥
時建多疑嘗於爐中燒金鼎命二妃親侍湯茶而已是
夜宮猫相戲悞觸鼎翻建良久曰栗爆燒氈破猫跳觸
鼎翻憶得盧延讓卷有此一聯乃知先輩裁詩信無虛
境來日遂有六行之拜自給事中
拜工部翰林學士吳融獨重
其作盛稱於時且云此子語不尋常後必垂名楊大年
云延讓詩至今存人亦有絕好之者其播人口有旅舍

言懷云名帑毛生五門下家僮骨立六街中蜀路云雲
間鬧鐸驟駛至雪裏殘骸虎拽來懷江上云餓貓臨鼠
穴噉犬舐魚砧八月十六日夜云只訛些子緣應耗沒
多光寄人云吟安一个字撚斷數莖鬚冬夜云樹上詔
諷批頰烏牕間壁駁叩頭蟲哭人云漸窮頑僕慵看馬
著慘佳人暗理箏狐衝官道過犬刺店門開祖張相每
稱之餓貓臨鼠穴噉犬舐魚砧成中令每稱之粟爆猫
跳之句王建愛之盧曰平生投謁公卿不意得猫狗力

延讓始投贄吳子華子華讀至不同文賦易爲著者之
乎笑曰上門惡罵來

本朝楊億在翰苑嘗召對上言及延讓詩曰臂鷹健卒
懸羶帽騎馬佳人卷盡衫似此淺近亦自成一體延讓
字子善范陽人光化初登第從事朗陵雷滿敗歸王建
僭位授水部外郎卒於刑部侍郎師薛能爲文

裴說 裴詩

唐舉子先投所業於公卿之門謂之行卷說只行五言

十九首至來年秋賦復行舊卷人有譏之者說曰只此十九首苦吟尚未有人見知假別行卷哉識者以爲知言說天復六年登甲科其詩以苦吟難得爲工且拘格律嘗有詩曰苦吟僧入定得句將成功又贈僧貫休云摠無方是法難得始爲詩又云是事精皆易唯詩會却難遭亂故宦不達多遊江湖間有石首縣詩云因攜一家住贏得半年吟深閨乍冷鑑開篋玉筋微微濕紅頰一陣霜風殺柳條濃烟半夜成黃葉垂垂白練明如

雪獨下閒階轉淒切祇知抱杵搗秋砧不覺高樓已無
月時聞寒鴈聲相喚紗牕只有燈相伴幾度齊紈又嬾
裁離腸恐逐金刀斷細想儀形執牙尺回刀剪破澄江
色愁捻銀針信手縫惆悵無人試寬窄時時舉袖勻紅
淚紅牋謾有千千字書中不盡心中事一半慙慙寄邊
使此說聞砧詩也說終禮部員外郎說與詣俱有詩名
詣唐天祐三年登第終於桂嶺假官宰字而已同在湘
江說詩云吟餘潮落岸水高經杜甫墳說云擬掘孤墳

破重教大雅生詰云名終埋不得骨便朽何妨景同而
語意俱別寔爲寔美說旅行聞寇云寸步邊多事將行
問四隣深山不畏虎當路却防人無事助明代何門鎖
此身空慙兩行淚飄洒向紅塵

洛中作云莫怪苦吟遲詩成鬢亦絲鬢絲猶可染詩病
却難醫山暝雲橫處星沉月側時冥搜不可得一句至
公知

中秋月云一歲幾盈虧當軒重此期幸無偏照處剛有

不明時色靜雲歸早光凝鶴宿遲望吟吟未足皎皎下

踈籬

碁云十九條平路言平又嶮巖人心無筭處手有輸
時勢迥流星遠聲乾下電遲臨軒繞一局寒日又西垂
喜友人再面云一別幾寒暄迢迢隔塞垣相思長有事
及見却無言靜坐將茶試閑書把葉翻依依又留宿圓
月上東軒

張爲

秋醉歌云金風颯已起還是招魚翁携酒天姥岑自彈
嶧陽桐脫却登山履赤脚翹青筇泉聲掃殘暑猿臂攀
長松翠微泛罇綠苔蘚分煙紅造化處術內相對數壺
空醉眠嶺上草不覺夜露濃一夢到天曉始覺一醉中
皎然夢中路直到瀛洲東初平把我臂相與騎白龍三
留對上帝玉樓十二重上帝賜我酒送我敲金鐘寶閣
香歛苒琪樹寒玲瓏動葉如笙篁音律相怡融珍重此
一醉百骸出天地長如此夢魂永謝名與利

爲唐末江南詩人與周朴齊名如到處即閉戶逢君方
展眉最有詩稱

爲作詩人主客圖序曰若主人門下處其客者以法度
一則也以白居易爲廣大教化主上入室楊乘入室張
祐羊士諤元稹升堂盧仝顧況沈亞之及門費冠卿皇
甫松殷堯藩施肩吾周元範祝元膺徐凝朱可名陳標
童翰卿以孟雲卿爲高古與逸主上入室韋應物入室
李賀杜牧李餘劉猛李涉胡幽正升堂李觀賈馳李宣

古曾鄴劉駕孟遲及門陳潤韋楚老以李益爲清竒雅
正主上入室蘇郁入室劉畋僧清塞盧休于鵠楊洵美
張籍楊巨源楊敬之僧無可姚合升堂方干馬戴任蕃
賈島厲元項斯薛壽及門僧良乂潘誠于武陵詹雄衛
準僧志定喻島朱慶餘以孟郊爲清竒僻苦主上入室
陳陶周朴及門劉得仁李溟以鮑溶爲博容宏拔主上
入室李群玉入室司馬退之張爲以武元衡爲瓌竒美
麗主上入室劉禹錫入室趙嘏長孫佐輔曹庚升堂盧

頻陳羽許渾張蕭遠及門張陵章孝標雍陶周祚袁不約

杜光庭載毛仙翁事云仙翁名干字鴻漸元和間劉禹錫李紳白樂天輩皆贈詩至大中戊寅五十餘年矣是歲張爲薄遊長沙不汲汲隨計獲女奴於岳麓下感之歲餘成羸疾仙翁一見曰子妖氣邪光浹遍肌骨苟不相值殞於旦夕也以一粒授爲於香爐焚之郁烈之氣聞百步魅妾一號而斃乃木偶人也又吞以丹砂和黍

者三疾遂瘳爲作詩別之曰羸形感神藥削骨生豐肌
蘭炷飄靈煙妖怪立誅夷重覩日月光何報父母慈黃
河濁袞袞別淚流澌澌黃河清有時別淚無收期爲後
入釣臺山訪道而去

韓偓

偓父瞻開成六年李義山同年也義山有餞韓同年西
迎家室戲贈云籍籍征西萬戶侯新緣貴婿起珠樓一
名我漫居先甲千騎君翻在上頭雲路招邀回綵鳳天

河迢遞笑牽牛南朝禁鬻無人近瘦盡瓊枝爲四愁
小字冬郎義山云嘗即席爲詩相送一座盡驚句有老
成之風因有詩云十歲裁詩走馬成冷灰殘燭動離情
桐花萬里丹山路雛鳳清於老鳳聲倥字致堯今日致
光誤矣自號玉山樵人

苑中云上苑離宮處處迷相風高與露盤齊金階鑄出
後猊立玉柱雕成翡翠啼外使調鷹初得按

五坊外案
使以鷹隼

初調習始能擒
獲謂之得案

中官過馬不教嘶

上乘馬必中官騎
以進謂之過馬

笙

歌錦綉雲霄裏獨許詞臣醉似泥

六月十七日召對詩云清暑簾開散異香思深咫尺對
龍章花應洞裏尋常發日向壺中特地長坐久忽疑槎
犯斗歸來魚恐海生桑如今冷笑東方朔唯用詼諧侍
漢皇

與吳子華侍郎同年玉堂伴直懷昔叙懇因成長句魚
呈同年云往年鷲谷接清塵今日鼇山作侍臣二紀許
偕勞筆硯一朝宣入掌絲綸

子與子華俱
久困名場

聲名烜赫文

章士金紫雍容富貴身絳帳恩深無路報語餘相聚却
酸辛

賜宴日詩云玉銜花馬踏天街詔遣追歡綺席開中使

押從天上去外人知自日邊來

是日在外四學士排門
齊人司進狀辭赴宴中

使二人
押出

臣心淨比漪漣水聖澤深於激灑杯綽有異思

頌稷契已將優禮及鄒枚清商迥向梨園降妖妓新行
峽雨迴不散通霄離禁直晚來殘醉入銀盃

醉着云萬里清江萬里天一村桑柘一村煙漁翁醉着

無人喚過午醒來雪滿船

即日云畫牆暗記移花日洗瓮先知醞酒期須信閑人
有忙事早來衝雨覓漁師

春恨云殘夢依依酒力餘城頭畫角伴啼鳥平明乍捲
西樓幕院靜初聞放轆轤

并州云戍旗青草杜榆關雨裏并州四月寒誰會憑欄
潛忍淚不勝天際似江干

偓天復初入翰林其年冬駕幸鳳翔偓有扈從之功返

正初上面許偓爲相奏云陛下運契中興當復用重德
鎮風俗臣座右僕射趙崇可充是選乞廻臣之命授
崇天下幸甚上喜歎翌日制用崇暨兵部侍郎王贊爲
相時梁太祖在京素聞崇之輕佻贊復有權馳入請見
於上前具言二公長短上曰趙崇是偓薦時偓在側梁
主叱之偓奏曰臣不敢與大臣爭上曰韓偓出尋謫官
入閩故詩云牕外日先飛野馬案前筠管長蒲盧謀身
拙爲安蛇足報國危曾捋虎鬚滿世可能無默識未知

誰擬試齊字

香奩集和魯公之詞也惟其艷麗故貴後嫁其名於倻
凝平生著述分爲續論遊藝孝悌疑獄香奩羸金六集
自爲遊藝集序云予有香奩羸金集不行於世凝在政
府避議論諱其名又欲後人知故遊藝集序實之此凝
之意也沈存中云

曹松

天復初杜德祥主文放松及王希羽劉象柯崇鄭希顏

等及第年皆七十餘時號五老榜時內難新平首求孤
貧人德祥以松等塞詔各授校書郎制曰念尔登科之
際當予反正之年宜降異恩各膺寵命

松字夢徵舒州人也學賈司倉爲詩此外無他能時號
松啓事爲送羊脚狀

松別湖州上主人云門繫釣舟雲滿岸借君幽致坐移
旬湖村夜叫白鷺鴈菱市曉暄深浦人遠水日邊重作
雪寒林燒後別生春不辭更住醒還醉太一東峰歸夢

類

李肇國史補云曲江大會此爲下第舉人邇來漸侈靡皆爲上列所占向之下第舉人不復預矣所以逼大會則先牒教坊請奏上御紫雲樓簾觀焉時或擬作樂則爲之移日故曹松詩云追遊若遇三清樂行從應妨一日春勅下後人置皮袋例以圖章酒器錢絹實其中逢花卽飲故張籍詩云無人不借花園宿到處皆携酒器行其皮袋狀元錄事同點檢闕一則罰金曲江之宴行

市羅列長安爲之半空公卿家率以是日揀選東牀車
馬闐塞莫可殫述

松及第勅下宴中獻坐主杜侍郎詩云得召邛墻淚却
頻若無公道也無因門前送勅朱衣吏席上銜盃碧落
人半夜笙歌教泥月平明桃杏放燒春南山雖有歸溪
路爭那酬恩未殺身

春日長安書事云浩浩看花晨六街揚遠塵塵中一丈
日誰是晏眠人御柳舞着水野鶯啼破春徒云還楚客

猶自惜離秦

晨起云曉色教不睡卷簾清氣中林殘數枝月髮冷一
梳風並鳥聞鐘語歌荷隔霧空莫徒營白日道路本無
窮

弔北邙云山下望山上夕陽明又曛無人醫白髮少地
着新墳歲代殊相遠賢愚旋不分東歸聊一弔亂木倚
寒雲

松有詩云憑君莫話封侯事一將功成萬骨枯可謂諳

世故矣

杜荀鶴

荀鶴有詩名號九華山人大順初擢第授翰林學士主
客外郎知制誥序其文爲唐風集或曰荀鶴牧之微子
也牧之會昌末自齊安移守秋浦時年四十四所謂使
君四十四兩佩在銅魚者也時妾有妊出嫁長林鄉正
杜筠而生荀鶴擢第年四十六矣

溪興云山雨溪風卷釣絲瓦甌蓬底獨斟時醉來睡着

無人喚流下前溪也不知

春宮怨云早被嬋娟誤欲粧臨鏡慵承恩不在貌教妾
若爲容風暖鳥聲碎日高花影重年年越溪女相憶採
芙蓉

荀鶴曾得詩一聯云舊衣灰絮絮新酒竹筩筩韋莊曰
我道印將金鎖鎖簾用玉鈎鈎即京兆大拜之祥也

贈僧云利門名路兩何憑百歲風前短焰燈只恐爲僧
心不了爲僧心了揔輸僧

時世行云夫因兵死守蓬茅麻紵裙衫鬢髮焦桑柘廢
來猶納稅田園荒盡尚徵苗時挑野菜和根煮旋斫生
柴帶葉燒任是深山更深處也應無計避征徭又云八
十老翁住破村村中牢落不堪論因供寨木無桑柘爲
點鄉兵絕子孫還似平寧徵賦稅未曾州縣略安存至
今鷄犬皆星散日落西山哭倚門

荀鶴擢第時危勢晏復還舊山田願在宣州甚重之願
起兵陰令以牋問至梁太祖許頗厚遇及願遇禍梁祖

表授翰林學士主客員外郎中知制誥恃勢侮易搢紳
衆怒欲殺之而未及天祐初卒

顧雲序其詩曰大順初皇帝命小宗伯河東裴公掌邦
貢次二年遠者來隱者出異人雋士大集都下於群進
士中得九華山人杜荀鶴拔居上第諸生謝恩日列座
既定公揖生謂曰聖上歛文教未張思得如高宗朝謝
洪拾遺陳公子昂輩作詩出沒二雅馳驟建安削苦澁
僻碎略淫靡淺切破豔冶之堅陣擒雕巧之首帥皆摧

撞折角崩潰解散掃蕩詞場豁清文祲然後有戴容州
劉隋州王江寧率其徒揚鞭按轡相與和樂來朝於正
道矣以生詩有陳體可以潤國風廣王澤故擢以塞詔
意勉爲中興詩宗生謝而退明年寧親江表以僕故山
偕隱者出詩三百篇見簡其雅麗凝鍊之句能使貪吏
廉邪臣正父慈子孝兄友弟悌人倫之紀備矣其壯語
大言則決起逸發可以左攬工部袂右拍翰林肩吞賈
喻八九於胸中曾不帶芥情動於中則極思冥搜神遊

希夷形瓦枯木五聲勞於呼吸萬象貧於抉剔信詩之
雄傑者也美哉裴公知人之爲不誣矣於戲旌別淑慝
史臣之職僕幸得爲之叙錄視其人齒尚壯才力未盡
謳吟之興方酣俟其繼作得如周頌者目之爲唐風集
荀鶴初謁梁王朱全忠雨作而天無行雲梁曰此謂天
泣知何祥請先作無雲雨詩乃賦曰同是乾坤事不同
雨絲飛洒日輪中若教陰顯都相似爭表梁王造化工
梁悅之

孫祭

題妓王福娘墻詩云移壁迴牕廢幾朝指鐙偷解博蘭
椒無端鬪草輸隣女更被捻將玉步搖鄭谷寄臺院孫
端公祭詩云才拙道仍孤無何捨釣徒班雖沾玉笋香
不近金爐雨露瞻雙闕煙波隔五湖唯君應是念曾共
伏青蒲曾同諫垣祭贈妓人云綵翠仙衣紅玉膚輕盈年在
破瓜初霞盃醉喚劉郎賭雲髻慵邀阿母梳不怕寒侵
緣帶寶每憂風舉倩持裾謾圖西子爲粧樣西子元來

未得如

題北里妓人壁云寒繡衣裳餉阿嬌新團香獸不禁燒
東隣起樣裙腰闊剝處黃金一兩條

王鐸

鐸字昭範重德名家位望崇顯率由文雅非定亂才鎮
渚宮爲都統以禦巢寇洎荊州失守復把潼關黃巢差
人傳語云令公儒生非我敵請自退避無污鋒刃於是
棄關相隨僖宗播遷於蜀再授都統收復京師大勲不

成竟落都統後有詩其要云黜詔已聞來闕下檄書猶未遍軍前亦志其中也

罷都統守鎮滑州作云用軍何事敢遷延思重才輕分使然黜詔已聞來闕下檄書猶未遍軍前腰間盡解蘇秦印波上虛迎范蠡船正會星辰扶北極却驅戈甲鎮南燕三塵上相逢明主九合諸侯媿昔賢看却中興扶大業殺身無路好歸田

鐸為侍御史于興宗守綿州登越王樓以詩寄朝士鐸

和云謝朓題詩處危樓壓郡城雨餘江水碧雲斷雪山
明錦綉來仙境風光入帝京恨無青玉案何以報高情
鐸謁梓潼張惡子廟詩曰盛唐聖主解青萍欲振新封
濟順名夜雨龍拋三尺匣青雲鳳入九重城

時僖宗幸蜀人情銜

士皆云春
內必還京

劍明喜氣隨雷動玉壘韶光待賊平惟報闕

東諸將相柱天功業賴陰兵

判度支蕭遘和云青骨祀吳誰讓德紫華居越亦知名
未聞一劍傳唐主長擁千山護蜀城斬馬威稜應掃蕩

截蛟鋒刃俟昇平
鄴侯爲國親簫鼓
堂上神籌更布兵

時僖宗解劔贈
神故二公賦詩

鄭綮

古今詩話曰相國綮善詩有題老僧詩云日照四山雪
老僧門未開凍瓶粘柱礎宿火燼爐灰童子病歸去鹿
麋寒入來常云此詩屬對可以衡秤言輕重不偏也或
曰相國近爲新詩否對曰詩思在灞橋風雪中驢子上
此處何以得之蓋言平生苦心也

縻字蘊武大順後王政微縻每以詩謠託諷中人有誦
之天子前者昭宗意其所蘊未盡因有司上班簿遂書
其側曰可禮部侍郎同中書門下平章事縻本善詩其
語多俳諧故使落調世號鄭五歇後體至是省史走其
家上謁縻笑曰諸君誤矣人皆不識字宰相亦不及我
俄聞制下歎曰歇後鄭五作宰相事可知矣立朝無復
故態纔三月去位

縻刺盧江將去別郡人云唯有兩行公解淚一時灑向

渡頭風其滑稽類此

胡玠

玠不知何許人嘗隱廬山苦心於五七言桑落洲一篇
云莫問桑田事但看桑落洲數家新住處昔日大江流
古岸崩欲盡平沙長未休想應百年後人世更悠悠

又月詩云輪中別有物

改云桂根
寧有土

光外更無空玠隱廬

山李騰廉問江西弓旌不至人多惜之

楊收

字藏之吳人呼爲神童兄發戲令詠蛙即曰兔邊分玉
樹龍底耀銅儀會當同鼓吹不復問官私

又令詠筆仍賦鑽字即曰雖匪囊中物何堅不可鑽一
朝操政事定使冠三端

吳人造門請詩觀者壓敗其牆收嘲曰爾幸無羸角何
用觸吾藩若是升堂者還應自得門

平曾

曾謁華州李固言不遇因吟一絕而去曰老夫三日門

前立珠箔銀屏畫不開詩卷却拋書袋裏正如閑看華
山來

曾恃才傲物竟歿於縣曹薛平僕射出鎮浙西主禮稍
薄曾留詩以諷之曰梯山航海幾崎嶇來謁金陵薛大
夫毛髮豎時趨劔戟衣冠儼處拜水壺誠知兩軸非珠
玉深愧三鱸郵旅途明日過江風景好不堪回首望勾
吳薛聞曾出境遣使追還縻留數日又獻繫白馬詩曰
白馬披鬃練一團今朝被絆欲行難雪中放去空留跡

月下牽來只見鞍向北長鳴天外遠臨風斜控耳邊寒
自知毛骨還應異更請孫陽子細看河東公曰若不留
絆行軒即得觀其毛骨遂以殊禮相待

唐以府元被黜者九人曾其一也曾長慶二年同賈闋
仙輦貶謂之舉場十惡曾後謁固於蜀幕中皆名士曾
輕忽無所畏遂獻雪山賦李覽命推出不旬日再獻鯨
魚賦曰此魚觸物而怒翻身上波爲烏鳶所獲奈魴鯉
何李覽之遂不至深罪

繆島雲

島雲少從浮圖其詩尤尚竒險至如四五片霞生絕壁
兩三行鴈過踈松又拋芥子降顛狒狒折楊枝灑醉猩
猩

廬山瀑布曰白鳥遠行樹玉虹孤飲潭皆夔出前輩開
成中常遊豫章武宗朝准勅反初名甚喧然

唐詩紀事卷六十五